

玄門持戒威儀

凡學人未習戒本不得習經法○入戒壇習初真戒未熟不得躡等受中極戒○闕戒本須焚香禮拜不得草率展閱○不得容人盜看戒本○不得盜聽真師說法○禮誦功課宜敬謹三時勿簡○已入鉢堂修煉身心者及行持中極戒歷三年者方受天仙戒○不得矯飾威儀求人恭敬○不得廣談因果希人布施○不得非時禮拜欲禮拜當在人靜時○不得占殿中央禮拜中央是常住位○主殿上香燈供具宜細行不得粗率○焚香時微咒曰 常焚心香得大清淨○上燈燭微咒曰 破除重暗洞照十方○不得專揀應赴經典習學○或遇貧難不堪當安命自慰不得怨天恨地○不得見士俗便說當布施作福○不得對外教談道法○不得強化施主財物亦不得囑托豪貴親知募化○不得貨殖營利○不得假托緣事募財為私用

○出入威儀

不得無故入他宮觀及僧院○不得無故至俗家○或有事至俗家事畢即返不得久留○不得與親俗小兒等笑談雜語○不得以衣物寄頓俗家○遠近出入不得失儀○同事或失儀不得非笑

事師威儀

朔望見師當禮拜○問師道法當禮拜除飲食時坐功時經
行時○欲禮拜師止之當順師命○師禮拜不得與師同禮
拜○師前不得受人禮拜○侍師講論道法師身心倦教去
應去○凡出入當先白師○製衣服冠巾等物當先白師○
作眾事如雲遊守山聽講興緣事等當先白師○人從已借
物當先白師師許然後與○欲從人借物當先白師師聽然
後去○欲習經懺當先白師○若人以物施當先白師已然
後受○已物欲施人當先白師師聽然後與○凡事白師師
聽與否皆當作禮而退不得含愠○師有疾宜盡心看視不
得懈怠○師令澣褻衣不得現裏○師令滌溺器不得嫌不
淨○師唾涕當即除去○燈月下不得履踐師影○師教戒
嚴切不得還逆語○人問師諱答云上某下某問號答云某
師

視聽威儀

閱經典當端坐體認○不得輒指日月虹霓○不得久視日
月雲漢○不得視外教書○不得視小說傳奇閒雜書○侍
坐師側及對賓客宜正視不得上視不得下視不得流視○
不得注視亂色嘆羨奇艷○隨師登高眺遠視師所視處不
得他視○隨師出入不得左右顧盼當低頭隨後○入城市
遇一切戲幻聚眾事不得注目視○歸不得侈談城市風景